

四庫全書

集部

欽定四庫全書

集部

才調集卷二

詳校官中書臣陸 湘

助教臣常循覆勘

覆校官中書臣汪師曾

校對官原任臣郭祚熾

謄錄監生臣金國禮

欽定四庫全書

集部八

才調集

總集類

提要

臣等謹案才調集十卷蜀監察御史韋穀撰
每卷錄詩一百首共一千首自序稱觀李杜
集元白詩而集中無杜詩馮舒謂崇重老杜
不欲芟擇然寔以杜詩高古與其書體例不
同故不採錄舒所說非也其中頗有舛誤如

李白錄愁陽春賦是賦非詩王建錄宮中調
笑詞是詞非詩皆乖體例賀知章錄柳枝詞
其曲起於中唐知章時未有其詞乃劉采春
女所歌亦非知章作劉禹錫錄別宥子怨乃
隋薛道衡昔昔鹽王之渙錄惆悵詞所咏乃
崔鶯鶯霍小玉事之渙不及見寔王奐作皆
姓名訛異然頗有諸家遺篇如白居易江南
贈蕭十九詩賈島贈杜駙馬詩皆本集所無

又沈佺期古意高稊竄改成律詩王維渭城
曲客舍青青楊柳春句俗本改為柳色新賈
島贈劒客詩誰為不平事俗本改為誰有如
斯之類此書皆獨存其舊亦足資考證也穀
生于五代文敝之際故所選取法晚唐以穠
麗宏敞為宗救粗疎淺漏之習未為無見至
馮舒馮班意欲排斥宋詩遂引其書於崑體
推為正宗不知李商隱等唐書但有三十六

體之目所謂西崑體者寔始于宋之楊億等
唐人無此名也乾隆四十一年五月恭校上

總纂官臣紀昀臣陸錫熊臣孫士毅

總校官臣陸費墀

才調集原序

余少博羣言常取得志雖秋螢之照不遠而雕蟲之見
自佳古人云自聽之謂聰內視之謂明也又安可受誚
於愚鹵取譏於書廚者哉暇日因閱李杜集元白詩其
間大海混茫風流挺特遂採摭奧妙并諸賢達章句不
可備錄各有編次或閒窗展卷或月榭行吟韻高而桂
魄爭光詞麗而春色鬬美但貴自樂所好豈敢垂諸後
昆今纂諸家歌詩共一千首每一百首成卷分之為十

目曰才調集庶幾來者不謂多言他代有人無嗤薄鑒
云爾

欽定四庫全書

才調集卷一目錄

白居易

十九首

代書詩一百韻寄微之

東南行一百韻

四不如酒

江南喜逢蕭九徹田話長安舊遊戲贈五十韻

楊柳枝二十韻

初與元九別後忽夢見之及寤而書適至兼寄
桐花詩悵然感懷因以此寄

秦中吟十首

三月三日祓禊洛濱

翫半開花贈皇甫郎中

題令狐家木蘭花

薛能

七首

牡丹

蜀黃葵

贈歌妓

晚春

贈歌者

舞者

楊柳枝

崔國輔

六首

雜詩

魏宮詞

怨詞

少年行

中流曲

對酒吟

孟浩然
二首

春怨

送杜十四之江南

劉長卿
六首

揚州雨中張十七宅觀妓

赴潤州留別鮑侍御

北歸次秋浦界青谿館

登餘干古縣城

若耶茗溪訓梁耿別後見寄

別宓子怨

韋應物
一首

滁州西澗

王維
二首

送元二使安西

隴頭吟

賈島
七首

寄遠

代舊將

春行

劍客

古意

上杜駙馬

早秋寄題天竺靈隱寺

李廓

一十六首

長安少年行

又

又

又

又

又

又

又

又

又

雞鳴曲

鏡聽詞

猛士行

送振武將軍

落第

贈商山東于嶺僧

常建

一首

弔王將軍墓

劉禹錫

五首

臺城

烏衣巷

石頭城

生公講堂

江令宅

宋濟

二首

東鄰美女歌

和王七度玉門關上吹笛

王建

十三首

華清宮感舊

宮前早春

宮中三臺詞

又

江南三臺詞

又

又

又

宮中調笑詞

又

又

又

贈王樞密

李端

一首

蕪城懷古

耿漳
二首

秋日

送王潤

李華
一首

長門怨

錢翊
七首

客舍寓懷

春恨

又

又

蜀國偶題

送王郎中

未展芭蕉

李遠

二首

失鶴

贈寫御真李長史

欽定四庫全書

才調集卷一

唐 韋穀 撰

白居易

十九首

代書詩一百韻寄微之

憶在貞元歲初登典校司身名同日授心事一言知肺
腑都無隔形骸兩不羈疎狂屬年少閑散為官卑分定
金蘭契言通藥石規交賢方汲汲友直每悃悃有月多
同賞無盃不共持秋風拂琴匣夜雪卷書帷高上慈恩

塔幽尋皇子陂唐昌玉藥會崇敬牡丹期笑勸迂平酒
閒吟短李詩儒風愛敦質佛理尚玄師度日曾無悶通
宵靡不為雙聲聯律句八面對宮棋往往遊三省騰騰
出九遠寒消直城路春到曲江池樹暝枝條弱山晴彩
翠奇峰攢石綠點柳惹麴塵絲岸草烟鋪地園花雪壓
枝蚤光紅照耀新溜碧逶迤帷幙侵堤布盤筵占地施
徵伶皆絕藝選妓悉名姬鉛黛凝春艷金鈿耀水嬉風
流誇墮髻時世鬪啼眉密坐隨歡促華尊逐勝移香飄

歌袂動翠落舞釵遺籌插紅螺挽觥飛白玉卮打嫌調
笑易飲訝卷波遲殘席誼譁散歸鞍酩酊騎酖顏烏帽
側醉袖玉鞭垂紫陌傳鐘鼓紅塵塞路歧幾時曾整別
何處不相隨荏苒星霜換迴環節候推兩衙多請假三
考欲成資運啟十年聖天成萬物宜皆當少壯日同惜
盛明時光景嗟虛擲雲霄竊暗窺攻文朝矻矻講學夜
孜孜策目穿如札鋒毫銳若錐繁張獲鳥網堅守釣魚
坻並受夔龍薦齊陳晁董詞萬言經濟畧三策太平基

中第爭無敵專場戰不疲輔車排勝陣犄角牽降旗雙
闕分容衛千僚儼等衰恩隨紫泥降名向白麻披既在
高科選還從好爵縻東垣君諫諍西邑我驅馳再喜登
烏府多慙侍赤墀官班分內外遊處遂參差每列鵷鸞
序偏瞻獬豸姿簡威霜凜冽衣綵繡歲蕤正色摧強禦
剛腸嫉喔咻常憎持祿位不擬保妻兒養勇當除惡輸
忠在滅私下譟驚驚雀當道懾狐狸南國人無怨東臺
吏不欺理寃多定國切諫甚辛毗造次行於是平生志

在茲道將心共直言與行兼危水暗波翻覆山藏路險
巖未為明主識已被倖臣疑木秀遭風折蘭芳遇霰萎
千鈞勢易壓一柱力難撐騰口因成瘡吹毛遂得疵憂
來吟貝錦謫去咏江離邂逅塵中遇慙勤馬上辭賈生
離魏闕王粲向荊夷水度清源寺山經綺季祠心搖漢
臯珮淚墮峴亭碑驛路緣雲際城樓枕水湄思鄉多繞
澤望闕獨登陴林晚青蕭索江平綠渺瀰野秋鳴蟋蟀
沙冷聚鷓鴣官舍黃茅屋人家苦竹籬白醪充夜酌紅

粟備晨炊寡鵠推風翻鰓魚失水髻閣雛啼渴旦涼葉
墜相思一點寒燈滅三聲曉角吹藍衫經雨故驄馬卧
霜羸念涸誰濡沫嫌醒自吸醅耳垂無伯樂舌在有張
儀負氣衝星劍傾心向日葵金言自銷鑠玉性肯磷緇
伸屈須看蠖窮通莫問龜定知身是患應用道為醫想
子今如彼嗟余獨在斯無慘當歲杪有夢到天涯坐阻
連襟帶行垂接履綦潤消衣上霧香散室中芝念遠緣
遷貶驚時為別離素書三往復明月七盈虧舊里非難

到餘歡不易追樹依興善老草傍靜安衰前事思如昨
中懷寫向誰北村尋古柏南宅訪辛夷此日空搔首何
人共解頤病多知夜永年長覺秋悲不飲長如醉加餐
亦似飢狂吟一千字因使寄微之

東南行一百韻寄通州元九侍御澧州李十一
舍人果州崔二十二使君開州韋大員外庾三
十二補闕杜十四拾遺李二十助教員外竇七
校書

南去經三楚東來過五湖山頭看候館水面問征途
遠窮江界天低極海隅飄零同落葉浩蕩似桑桴漸覺
鄉原異深知土產殊夷音語嘲啗蠻態笑睢盱水市通
闌闌煙村混舳艫吏徵漁戶稅人納火田租亥日饒蝦
蟹寅年足虎驅成人男作州事鬼女為巫樓暗攢娼婦
堤喧簇販夫夜船論鋪賃春酒斷瓶沽見果皆盧橘聞
禽悉鷓鴣山歌猿獨叫野哭鳥相呼嶺徼雲成棧江郊
水當郭月移翹柱鶴風汎颭牆烏鰲礙潮無信蛟驚浪

不虞鼉鳴泉窟室蜃結氣浮圖樹裂山魑穴沙含水弩
樞喘牛犁紫芋羸馬放青菰繡面誰家婢鴟頭幾歲奴
泥中採菱爰燒後拾樵蘓鼎膩愁烹鼈盤腥厭鱸鍾
儀徒戀楚張翰浪思吳氣序涼還熱光陰旦復晡身方
逐萍梗年欲近桑榆渭北田園廢江西歲月徂憶歸恒
慘澹懷舊忽踟躕自念咸秦客常為鄒魯儒蘊藏經國
術輕棄度關繻賦力凌鸚鵡詞鋒敵輓轡戰文重掉鞅
射策一彎弧崔杜鞭齊下元韋轡並驅名聲逼揚馬交

分過蕭朱世務經磨揣周行竊覲覲風雲皆會合雨露
各霑濡共遇昇平代偏慙固陋軀承明連夜直建禮拂
晨趨美服頒王府珍饈降御廚議高通白虎諫切伏青
蒲柏殿行陪宴花樓走看酺神旗張鳥獸天籟動笙竿
戈劒星芒耀魚龍電策驅定場排漢旅促座進吳歛縹
緲疑仙樂嬋娟勝畫圖歌鬟低翠羽舞汗墜紅珠別選
閒遊伴潛招小飲徒一盃愁已破三盞氣彌龐美仇
家酒幽閒葛氏姝十千方得斗二八正當壚論笑杓胡

律談憐輦嘒嘒李酣尤短寬庾醉更薦迂鞍馬呼教住
骰盤喝遣輸長驅波卷白連擲彩成盧籌併頻逃席觥
嚴列置盃滿卮邨可灌頽玉不勝扶入視中樞草歸藥
內廐駒醉曾衝宰相驕不揖金吾日近恩雖重雲高勢
却孤翻身落霄漢失脚倒塗塗博望移門籍潯陽佐郡
符時情變寒暑世利算錙銖即日辭雙闕明朝別九衢
播遷分郡國次第出京都秦嶺馳三驛商山上二邛峴
陽亭寂寞夏口路崎嶇大道全生棘中丁盡執艾江關

未徹警淮冠尚稽誅林對東西寺山分大小姑廬峰蓮
刻削湓浦帶縈紆九派吞青草孤城覆綠蕪黃昏鐘寂
寂清曉角鳴鳴春色辭門柳秋聲到井梧殘芳悲鶗鴂
莫節感茱萸蕊折金英菊花飄雪片蘆波紅日斜沒沙
白月平鋪幾見林抽笋頻驚燕引雛歲華何倏忽年少
不須臾眇默思千古蒼茫想八區孔窮緣底事顏夭有
何辜龍智猶經醢龜靈未免剗窮通應已定聖哲不能
踰況我身謀拙逢他厄運拘漂流從大海鋹鍛任洪爐

險阻嘗之矣。栖遲命也。夫沈冥消意氣，窮餓耗肌膚，防
障和殘藥，迎寒補舊襦。書床鳴蟋蟀，琴匣網蜘蛛。貧室
如懸磬，端憂劇守株。時遭人指點，數被鬼揶揄。兀都
疑夢昏昏半，似愚女驚朝不起。妻怪夜長吁，萬里拋朋
侶。三年隔友于，自然悲聚散。不是恨榮枯，去夏微之瘡。
今春席八殂，天涯書達否。泉下哭知無，謾寫詩盈卷。空
盛酒滿壺，只添新悵望。豈復舊歡娛，壯志因愁減。衰容
與病俱，相逢應不識。滿領白髭鬚。

四不如酒

集作咏
木曲

莫買寶剪刀徒費千金直
我有心中愁知君剪不得
莫磨解結錐徒勞人氣力
我有腸中結知君解不得
莫染紅絲線徒誇好顏色
我有雙淚珠知君穿不得
莫近紅爐火炎氣徒相逼
我有兩鬢雪知君銷不得
刀不能解心愁錐不能解
腸結絲不能穿淚珠火不能銷
鬢雪不能飲此神聖杯
萬恨千愁一時歇

江南喜逢蕭九徹因話長安舊遊戲贈五十韻

憶昔嬉遊伴多陪歡宴場寓居同永樂幽會共平康師
子尋前曲聲兒出內坊花深態奴宅竹錯得憐堂庭晚
開紅藥門閑陰綠楊經過悉同巷居處盡連牆時世高
梳髻風流澹作粧戴花紅石竹帔暈紫檳榔鬢動懸蟬
翼釵垂小鳳行拂胸輕粉絮煖手小香囊選勝移銀燭
邀歡舉玉觴鑪烟凝麝氣酒色注鶯黃急管停還奏繁
絃慢更張雪飛迴舞袖塵起繞歌梁舊曲翻調笑新聲
打義揚名情推阿軌巧語許秋娘風煖春將暮星迴夜

未央宴餘添粉黛坐久換衣裳結伴歸深院分頭入洞
房綵帷開翡翠羅薦拂鴛鴦留宿爭牽袖貪眠各占牀
綠窗籠水影紅壁背燈光索鏡收花鈿邀人解袷襠暗
嬌粧靨笑私語口脂香怕曉聽鐘坐羞明暎縵藏眉殘
蛾翠淺鬟解綠雲長聚散知無定憂歡事不常離筵開
夕宴別騎促晨裝去住青門外留連瀝水旁車行遙寄
語馬駐共相望雲雨分何處山川各異方野行初寂寞
店宿乍恓惶別後嫌宵永愁來厭歲芳幾看花結子頻

見露為霜歲月何超忽音容坐渺茫還書斷絕來去
夢遊揚自我辭秦地逢君客楚鄉常嗟異岐路忽喜共
舟航話舊堪垂淚思鄉數斷腸愁雲接巫峽淚竹近瀟
湘月落江湖闊天高節候涼浦深煙漠漠沙冷月蒼蒼
紅葉江楓老青燕驛路荒野風吹蟋蟀湖水浸菰蔣帝
路何由見心期不可忘舊遊千里外往事十年強春晝
提壺飲秋林摘橘嘗強歌還自感縱酒不成狂永夜長
相憶逢君各共傷慙勤萬里意併寫贈蕭郎

楊柳枝二十韻

小妓攜桃葉新歌蹋柳枝粧成剪燭後醉起拂衫時繡
履嬌行緩花筵笑上遲身輕委迴雪羅薄透凝脂笙引
簧頻暖箏摧柱數移樂童翻怨調才子與妍詞便想人
如樹先將髮比絲風條搖兩帶煙葉貼雙眉口動櫻桃
破鬟低翡翠垂枝柔腰嫋娜美嫩手葳蕤唳鶴晴呼伴
哀猿夜叫兒玉敲音歷歷珠貫字索索袖為收聲點釵
因赴節遺重重偏頭別一一拍心知塞北愁攀折江南

苦別離黃遮金谷岸綠映杏園池春惜芳華好秋憐翠
色衰取來歌裡唱勝向笛中吹曲罷那能別情多不自
持纏頭無別物一首斷腸詩

初與元九別後忽夢見之及寤而書適至兼寄

桐花詩悵然感懷因以此寄

元九初
謫江陵

永壽寺中語新昌坊北分歸來數行淚悲事不悲君悠
悠藍田路自去無消息計君食宿程已過商山北昨夜
雲四散千里同月色曉來夢見君應是君相憶夢中握

君手問君意何如君言苦相憶無人可寄書覺來未及
說扣門聲簌簌言是商州使送君書一封枕上忽驚起
顛倒著衣裳開緘見手札一紙十三行上論遷謫心下
說離別腸心腸都未盡不暇叙炎涼云作此書夜夜宿
商州東獨對孤燈坐陽城山館中夜深作書畢山月向
西斜月前何所有一樹紫桐花桐花半落時復道正相
思慙勤書背後兼寄桐花詩桐花詩八韻思緒一何深
以我今朝意憶君此夜心一章三遍讀一句十迴吟珍

重八十字字字化為金

秦中吟

并序。序題
與時刻稍異

貞元元和之際余在長安聞見之間有足悲
者因直歌其事命為秦中吟

議婚

或刻貧
家女

天下無正聲悅耳即為娛人間無正色悅目即為姝顏
色非相遠貧富則有殊貧為時所棄富為時所趨紅樓
富家女金縷繡羅襦見人不斂手嬌癡二八初母兄未

開口言嫁不須臾綠窗貧家女寂寞二十餘荆釵不直
錢衣上無真珠幾迴人欲聘臨日又躊躇主人會良媒
置酒滿玉壺四座且勿飲聽余歌兩途富家女易嫁嫁
蚤輕其夫貧家女難嫁嫁晚孝於姑聞君欲娶婦娶婦
意何如

重賦

或刻無
名稅

厚地植桑麻所用濟生民生民理布帛所求活一身身
外充征賦上以奉君親國家定兩稅本意在愛人厥初

防其淫明敕內外臣稅外加一物皆以枉法論奈何歲
月久貪吏得因循役我以求寵斂索無冬春織絹未成
足綠絲未盈斤里胥逼我納不許整逡巡歲莫天地閉
陰風生破村夜深煙火盡霰雪白紛紛幼者形不蔽老
者體無溫悲啼與寒氣併入鼻中辛昨日輸殘稅因窺
官庫門繒帛如山積絲絮似雲屯號為羨餘物隨月獻
至尊奪我身上煖買爾眼前恩進入瓊林庫歲久化為
塵

傷大宅

長慶少
一大字

誰家起甲第朱門大道邊
豐屋中擲比高牆外迴環
累六七堂簷宇相連延一
堂費百萬鬱鬱起青煙洞
房溫且清寒暑不能干高
亭虛且迴坐卧見南山繞
廊紫藤架夾砌紅藥闌攀
枝摘櫻桃帶花移牡丹主
人此中坐十載為大官廚
有臭敗肉庫有貫朽錢誰
能將我語問爾骨肉間豈
無貧賤者忍不救飢寒如
何奉一身直欲保千年不
見馬家宅今作奉誠園

傷友

或刻膠漆契

陋巷孤寒士出門甚栖栖雖云志氣高豈免顏色低平生同袍友通籍在金閨曩者膠漆契邇來雲雨睽正逢下朝歸軒騎五門西是時天久陰三日雨淒淒蹇驢避路立肥馬當風嘶迴頭望相識占道上沙堤昔年洛陽社貧賤相提攜今日長安道對面隔雲泥近日多如此非君獨慘悽死生不變者惟聞任與黎

合致仕

合長慶作不

七十而致仕禮法有明文何乃貪榮貴斯言如不聞可
憐八九十齒隋雙眸昏朝露貪多利夕陽憂子孫挂冠
顧翠纓懸車惜朱輪金章腰不勝偃僂入君門誰不愛
富貴誰不戀君恩年高須告老名遂合退身少時共嗤
笑晚歲多因循賢哉漢二疎彼獨是何人寂寞東門路
無人繼去塵

立碑

或刻
古碑

勛德既下衰文章亦陵夷但見山中石立作路旁碑銘

勛悉太公叙德皆仲尼復以多為貴千言直萬賢為文
彼何人想見下筆時但欲愚者悅不思賢者嗤豈獨賢
者嗤仍傳後代疑古石蒼苔字安知是媿詞我聞望江
縣麴令撫孤嫠在官有仁政名不聞京師身歿欲歸葬
百姓遮路岐攀轅不得去留葬此江湄至今道其名男
女皆涕垂無人立碑碣惟有邑人知

輕肥

或刻江
南旱

意氣驕滿路鞍馬光照塵借問何為者人稱是內臣朱

紱皆大夫紫綬悉將軍誇赴中軍宴走馬疾如雲樽罍
溢九醞水陸羅八珍果擘洞庭橘鱠切天池鱗食飽心
自若酒酣氣益振是歲江南旱衢州人食人

五絃琴

清歌且停唱紅袂亦停舞趙叟抱五絃宛轉當胸撫大
聲麤若散颯颯風和雨小聲細若絕切切鬼神語又如
鵲報喜轉作猿啼苦十指無定音顛倒宮商羽坐客聞
此聲形神若無主行客聞此聲駐足不能舉嗟嗟俗人

耳好今不好古所以北窗琴日日生塵土

歌舞

或刻傷閑
鄉縣囚

秦中歲云莫大雪滿皇州雪中退朝者朱紫盡公侯貴
有風雪興富無飢寒憂所營惟第宅所務在追遊朱門
車馬客紅燭歌舞樓歡酣促密坐醉煖脫重裘秋官為
主人廷尉居上頭日中為樂飲夜半不能休豈知闔鄉
獄中有凍死囚

買花

或刻
牡丹

帝城春欲莫喧喧車馬度共道牡丹時相隨買花去貴
賤無常價訓直看花數灼灼百朵紅茱茱五束素上張
帷幄庇旁織笆籬護水灑後泥封遷來色如故家家習
為俗人人迷不悟有一田舍翁偶來買花處低頭獨長
歎此歎無人諭一叢深色花十戶中人賦

三月三日被禊洛濱

序與舊
刻不同

開成二年三月三日河南尹李待價以人和
歲稔將禊於洛濱前一日啟留守裴令公公

明日召太子少傅白居易太子賓客蕭籍李
仍叔劉禹錫前中書舍人鄭居中國子司業
裴惲河南少尹李道樞倉部郎中崔晉司封
員外郎張可績駕部員外郎盧言虞部員外
郎苗愔和州刺史裴儔淄州刺史裴洽檢校
禮部員外郎楊魯士四門博士談弘謩等一
十五人合宴於舟中由斗亭歷魏堤抵津橋
登臨沂沿自晨至暮簪組交映歌笑間發前

水嬉而後妓樂左筆研而右壺觴望之若仙
觀者如堵盡風光之賞極遊泛之娛美景良
辰賞心樂事盡得於今日矣若不記錄謂洛
無人晉公首賦一章鏗然玉振顧謂四座繼
而和之居易舉酒抽毫奉十二韵以獻

三月草萋萋黃鶯歇又啼柳橋晴有絮沙路潤無泥襖
事修初半遊人到欲齊金鈿耀桃李絲管駭鳬鷺轉岸
迴船尾臨流簇馬蹄開翻楊子渡踏破魏王堤妓接謝

公宴詩陪江令題舟同李膺汎醴為穆王攜水引春心
蕩花牽醉眼迷塵街從鼓動煙樹任鴉栖舞急紅腰軟
歌遲翠黛低夜歸何用燭新月鳳樓西

翫半開花贈皇甫郎中

忽訝春來晚無嫌花發遲人憐全盛日我愛半開時紫
蠟黏為蒂紅酥點作蕤成都新夾纈梁漢碎臙脂樹杪
真珠顆牆頭小女兒淺深粧剝落高下火參差蝶戲爭
香采鶯啼選穩枝好教郎作伴合共酒相隨醉翫無勝

此狂嘲更讓誰猶殘少年興不似老人詩西日憑輕照
東風莫驟吹明朝應爛漫後夜即離披枝下遙相憶尊
前暗有期銜杯嚼蕊思惟我與君知

題令狐家木蘭花

膩如玉指塗朱粉光似金刀剪紫霞從此時時春夢裡
應添一樹女郎花

薛能七首

牡丹

去年零落暮春時
淚濕紅牋怨別詩
常恐便隨巫峽散
何因重有武陵期
傳情每向馨香得
不語還應彼此知
欲就閑邊安枕席
夜深閒共說相思

黃蜀葵

一刻蜀葵

嬌黃初綻欲題詩
盡日含毫有所思
記得玉人春病後
道家装束厭禳時

贈歌妓

一刻贈解詩歌人

同有詩情自合親
不須歌調更含嚙
朝天御史非韓壽

莫竊香來帶累人

晚春

惡憐風景極交親
每恨年年作瘦人
卧晚不曾拋好夜
情多惟欲哭殘春
陰成杏葉纔通日
雨著楊花已汙塵
無限後期知有在
只愁還作總戎身

贈歌者

一字新聲一顆珠
轉喉疑是擊珊瑚
聽時坐部音中有
唱後櫻花葉裏無
漢浦茂聞虛解佩
臨邛焉用枉當壚

誰人得向青樓宿便是仙郎不是夫

舞者

綠毛釵動小相思一唱南軒日午時慢鞞輕裙行欲近
待調諸曲起來遲筵停匕筯無非聽吻帶宮商盡是詞
為問傾城年幾許更勝瓊樹是瓊枝

楊柳枝

一刻無
楊字

數首新詞帶恨成柳絲牽我我傷情柔娥幸有腰肢穩
試踏吹聲作唱聲

崔國輔 六首

雜詩

英靈集
小異

逢著平樂兒論交鞍馬前與沽一斗酒恰用十千錢後
余在關內作事多迍邐何處有相救徒聞寶劍篇

魏宮詞

英靈集
小異

朝日點紅粧擬上銅雀臺畫眉猶未了魏帝使人催

怨詞

英靈集
同

妾有羅衣裳秦王在時作為舞春風多秋來不堪著

少年行

英靈國秀
二集同

遺却珊瑚鞭白馬驕不行
章臺折楊柳春日路旁情

中流曲

歸時日尚蚤更欲向芳洲
渡口水流急迴船不自由

對酒吟

英靈集
小異

行行日將夕荒村古塚無人迹
朦朧荊棘一鳥吟屢唱
提壺沽酒聲古人不達酒不足
遺恨精靈傳此曲寄語
當代諸少年平生且盡杯中醪

孟浩然 二首

春怨

佳人能畫眉
粧罷出簾幃
照水空自愛
折花將遺誰
春情多艷逸
春意倍相思
愁心極楊柳
一動亂如絲

送杜十四之江南

集無之江南三字

荆吳相接水為鄉
君去春江正淼茫
日莫征帆泊何處
天涯一望斷人腸

劉長卿 六首

楊州雨中張十七宅觀妓

或刻
張謂

夜色帶春煙燈花拂更燃
殘粧添石黛艷舞落金鈿
掩笑頻歌扇迎歌乍動絃
不知巫峽雨何事海西邊

赴潤州留別鮑侍御

對水看山別離孤舟日莫行
遲江南江北春草獨向金陵
去時

北歸次秋浦界青谿館

萬里猿啼斷孤村客暫依
雁過彭蠡暮人向宛陵稀
舊

路青山在餘生白首歸漸知行近北不見鷓鴣飛

登餘千古縣城

孤城上與白雲齊萬古蕭條楚水西官舍已空秋草綠
女牆猶在夜烏啼平江渺渺來人遠落日亭亭向客低
沙鳥不知陵谷變朝來莫去弋陽溪

若耶茗溪訓梁耿別後見寄

晴川落日初低惆悵孤舟解攜鳥向平蕪遠近人隨流
水東西白雲千里萬里明月前溪後溪獨恨長沙謫去

江潭春草萋萋

別宕子怨

垂柳拂金堤
靡蕪葉正齊
水溢芙蓉沼
花飛桃李蹊
採桑秦氏女
織錦賈家妻
關山別宕子
風月守空閨
恒斂千金笑
長垂雙玉啼
盤龍隨鏡隱
舞鳳逐雲低
驚魂同楚鶴
倦寢憶晨鷄
暗牖懸蛛網
空梁落燕泥
前年過岱北
今歲送遼西
一去無還意
那能惜馬蹄

韋應物

一首

滁州西澗

御覽集
作西澗

獨憐幽草澗邊生
上有黃鸝深樹鳴
春潮帶雨晚來急
野渡無人舟自橫

王維二首

送元二使安西

渭城朝雨裊輕塵
客舍青青楊柳春
勸君更盡一杯酒
西出陽關無故人

龍頭吟

英靈集
小異

長城少年遊俠客
夜上戍樓看太白
龍頭明月迴臨關
隴上行人夜吹笛
關西老將不勝愁
驅馬聽之雙淚流
身經大小百餘戰
麾下偏裨萬戶侯
蘓武才為典屬國
節旄空盡海西頭

賈島

七首

寄遠

別腸長鬱紆
豈能肥肌膚
始知相結密
不及相結疎
疎疎別恨應
少密別恨難
祛門前南去
水中有北飛
魚魚飛

向北海可以寄遠書

別刻無此句多此情復何如欲剪衣上襟書作寄遠書三句

不

惜寄遠書故人今在無

別刻華山峒克形遙望齊平蕪二句

況此數尺身

阻彼萬里途自非日月光難以知子軀

代舊將

舊事說如夢誰當信老夫戰場幾處在部曲一人無落
日收病馬晴天曬陣圖猶希聖朝用自鐫白髭鬚

春行

去去行人遠塵隨馬不窮旅情斜日後春色早煙中流

水穿空館閒花發故宮舊鄉千里思池上綠楊風

劍客

或刻述劍

十年磨一劍霜刃未曾試今日把示君誰有不平事

古意

碌碌復碌碌百年雙轉轂志士中夜心良馬白日足俱
為不等閒誰是知音目別來兩淚盡誰向荆山哭

集本作眼

中兩行淚曾

吊三獻玉

上杜駙馬

即杜餘

玉山突兀壓乾坤，出得朱門入戟門。
妻是九重天子女，身為一品令公孫。
鴛鴦殿裏參皇后，龍鳳堂前賀至尊。
今日澧陽非久駐，佇為霖雨拜新恩。

蚤秋寄天竺靈隱寺

一刻天台
靈應寺

峰前峰後寺新秋，絕頂高窗見沃洲。
人在定中聞蟋蟀，鶴從棲處挂獼猴。
山鐘夜渡空江水，汀月寒生古石樓。
心憶挂帆身未遂，謝公此地昔年遊。

李廓

一十六首

長安少年行

金紫少年郎繞街鞍馬光
身從左中尉官屬右春坊
刻戴揚州帽重薰異國香
垂鞭踏青草來去杏園芳

又

追逐輕薄伴閒遊不著緋
長攏出獵馬數換打裘衣
曉日尋花去春風帶酒歸
青樓無晝夜歌舞歇時稀

又

日高春睡足帖馬賞年華
倒插銀魚袋行隨金犢車
還

攜新市酒遠醉曲江花幾度歸伊黑金吾送到家

又

好勝耽長夜天明燭滿樓留人看獨腳賭馬換偏頭樂
奏曾無歇杯巡不暫休時時遙冷笑怪客有春愁

又

遨遊攜艷妓裝束似男兒杯酒逢花住笙歌簇馬吹鶯
聲催曲急春色送歸遲不以聞街鼓華筵待月移

又

賞春惟逐勝大宅可曾歸不樂還逃席多狂慣衩衣歌
人踏日起語燕卷簾飛婦好唯相妬倡樓不醉稀

又

戟門連日閉苦飲惜殘春開鎖通新客教姬舞醉人清
歌牽白馬自舞蹈紅茵時輩皆相許平生不負身

又

新年高殿上始見有光輝玉雁排方帶金鷺立仗衣酒
深和碗賜馬疾打珂飛朝下人爭看春街意氣歸

又

遊市慵騎馬隨姬入坐車樓邊聽歌吹簾外見鶯花樂
眼從人鬧歸心畏日斜蒼頭來去報飲伴到倡家

又

小婦教鸚鵡頭邊喚醉醒犬嬌眠玉簾鷹摯撼金鈴碧
地攢花障紅泥待客停雖然長按曲不飲不曾聽

雞鳴曲

星稀月沒入五更膠角角雞初鳴征人牽馬出門立

辭妾欲向安西行再鳴引頸簷頭下月中角聲催上馬
纔分曙色第二鳴旌旆紅塵已出城婦人上城亂招手
夫婿不聞遙哭聲長恨難鳴別時苦不遣難栖近窗戶

鏡聽詞

古之鏡聽猶
今之八卦也

匣中取鏡辭竈王羅衣掩盡明月光昔時長著照容色
今夜潛將聽消息門前地黑人來稀無人錯道朝夕歸
更深弱體冷如鐵繡帶菱花懷裏熱銅片銅片如有靈
願照得見行人千里形

猛士行

戰鼓驚沙惡天色猛士虬鬚眼前黑單于衣錦日行兵
陣頭走馬生擒得幽并少年不敢輕虎狼窟裏空手行

送振武將軍

葉葉歸邊騎風頭萬里乾金裝腰帶重鐵縫耳衣寒蘆
酒燒蓬煖霜鴻撚箭看黃河古城道秋雪白湯湯

落第

榜前潛制淚衆裏自嫌身氣味如中酒情懷似別人暖

風張樂席晴日看花塵盡是添愁處深居乞過春

贈商山東于嶺僧

商嶺東西路欲分兩間茅屋一溪雲師言耳重知師意
人是人非不欲聞

常建

一首

弔王將軍墓

英靈集
小異

嫖姚北伐時深入幾千里戰餘落日黃軍敗鼓聲死常
聞漢飛將可奪單于壘今與山鬼鄰殘兵哭遼水

劉禹錫

五首

臺城

臺城六代競豪華，結綺臨春事最奢。
萬戶千門成野草，只緣一曲後庭花。

烏衣巷

朱雀橋邊野草花，烏衣巷口夕陽斜。
舊時王謝堂前燕，飛入尋常百姓家。

石頭城

山園故國周遭在潮打空城寂寞迴淮水東邊舊時月
夜深還過女牆來

生公講堂

生公說法鬼神聽身後空堂夜不扃高座寂寥塵漠漠
一方明月可中庭

江令宅

南朝詞臣北朝客歸來惟見秦淮碧池臺竹樹三畝餘
至今人道江家宅

宋濟

二首

東鄰美女歌

花暖江城斜日陰鶯啼繡戶曉雲深
春風不道珠簾隔
傳得歌聲與客心

和王七度玉門關上吹笛

一刻
高適

胡人吹笛戍樓間樓上蕭條海月閒
借問梅花何處落
風吹一夜滿關山

王建

十三首

華清宮感舊

塵到朝元邊使急千官夜發六龍迴輦前月照羅衫淚
馬上風吹蠟燭灰公主粧樓金鎖澁貴妃湯殿玉蓮開
有時雲外聞天樂知是先皇沐浴來

宮前早春

酒幔高樓一百家宮前楊柳寺前花內園分得溫湯水
二月中旬已進瓜

宮中三臺詞

魚藻池邊射鴨芙蓉苑裏看花日色
柘袍相似不著紅鸞扇遮

又

池北池南草綠殿前殿後花紅
天子千年萬歲未央明月清風

江南三臺詞

楊柳橋邊少婦長安市裏商人
三年不得消息各自拜鬼求神

又

青草湖邊草色飛猿嶺上猿聲萬里湘江客到有風有

雨人行

又

樹頭花落花開道上人去人來朝愁暮愁即老百年幾
度三臺

又

聞身強健且為頭白齒落難追準擬百年千歲能得幾

許多時

宮中調笑詞

團扇團扇美人病來遮面玉容憔悴三年誰復商量管絃管絃管春草昭陽路斷

又

蝴蝶蝴蝶飛上金花枝葉君前對舞春風百葉桃花樹紅紅樹紅樹燕語鶯啼日暮

又

羅袖羅袖暗舞春風已舊遙看歌舞玉樓好日新粧坐
愁愁坐愁坐一世浮生虛過

又

楊柳楊柳日莫白沙渡口船頭江水茫茫商人小婦斷
腸腸斷腸斷鷓鴣夜啼失伴

贈王樞密

三朝行坐鎮相隨今上春宮見小時脫下御衣先賜著
進來龍馬便教騎長承密旨歸家少獨奉邊庭出殿遲

金少府人
不是當家偏向說

一本作自是
姓同親向說

九重爭得外人知

李端一首

蕪城懷古

極玄
集同

風吹城上樹草沒城邊路城裏月明時精靈自來去

耿漳二首

秋日

極玄
集同

迢迢入閣巷憂來與誰語古道無人行秋風動禾黍

送王潤

相送臨寒水蒼然望故關江蕪連夢澤楚雪入南山話
我他年舊看君此日還因將自悲淚一灑別離間

李華一首

長門怨

弱體鴛鴦薦啼粧翡翠衾鴉鳴秋殿曉人靜禁門深每
憶椒房寵邛堪永巷陰日驚羅帶緩非復舊來心

錢翊七首

客舍寓懷

金人集卷一
卷一
灑灑灘聲晚霽時客亭風袖半披垂野雲行止誰相待
明月襟懷祇自知無伴侶吟溪上路有花偷笑臘前枝
牽情景物潛惆悵忽似傷春遠別離

春恨

負罪將軍在北朝秦淮芳草綠迢迢高臺愛妾魂銷盡
始得丘遲為一招

又

久戍臨洮報未歸篋香銷盡別時衣身輕願比蘭堦蝶

萬里還尋塞草飛

又

永巷頻聞小苑遊
舊恩如淚亦難收
君前願報新顏色
團扇須防白露秋

蜀國偶題

忽憶明皇西幸時
暗傷潛恨竟誰知
佩蘭應語宮臣道
莫向金盤進荔枝

送王郎中

惜別遠相送却成惆悵多獨歸回首處爭奈暮山何

未展芭蕉

冷燭無煙綠蠟乾芳心猶卷怯春寒一緘書札藏何事
曾被東風暗拆看

李遠二首

失鶴

秋風吹起九臯禽一片閒雲萬里心碧落有情應悵望
瑤臺無路可追尋來時白雪翎猶短去日丹砂頂漸深

華表柱頭留語後更無消息到如今

贈寫御真李長史

玉座煙消硯水清
龍髯不動彩毫輕
初分隆準山河秀
再點重瞳日月明
宮女卷簾皆暗認
侍臣開殿盡遙驚
三朝供奉應無敵
始覺僧繇浪得名

才調集卷一

欽定四庫全書

才調集卷二目錄

溫飛卿

六十一首

過華清宮二十二韻

洞戶二十二韻

握柘詞

碧澗驛曉思

送人東遊

偶題

贈知音

鄠杜郊居

送李億東歸

陳宮詞

春日野行

西州詞

春洲曲

陽春曲

堂堂曲

春日將欲東歸寄新及第苗紳先輩

經李徵君故居

經舊遊

宿杜城亡友李羽處士故墅

夜看牡丹

池塘七夕

和友人悼亡

和王秀才傷歌姬

春莫宴罷寄宋壽

題柳

春日偶成

途中偶作

贈彈箏人

瑤瑟怨

春日野行

和友人溪居別業

宿城南亡友別墅

偶遊

郭處士擊甌歌

錦城曲

張靜婉採蓮曲

照影曲

塞寒曲

湖陰詞

晚歸曲

湘東夜宴曲

碌碌古詞

春野行

醉歌

織錦詞

蓮浦謠

達摩支曲

三洲詞

舞衣曲

惜春詞

春愁曲

蘓小小歌

春江花月夜詞

懊惱曲

邊笳曲

春曉曲

俠客行

春日

咏嘯

太子池

又

顧况十一首

悲歌

思遠曲

悲歌

又

又

又

梁廣畫花歌

送別日晚歌

行路難

棄婦詞

送行歌

吳融
二首

剡東筵上有寄

富水驛東楹有人題詩

崔塗
六首

夕次洛陽道中

巴南道中

巴陵夜泊

春夕旅遊

放鷓鴣

巫峽旅別

盧綸

七首

春詞

早春歸塾屋別業寄耿拾遺漳李校書端

晚次鄂州

古豔詞

又

代袁將軍罷戰歸舊里贈朔北故人

逢南中使因寄嶺外故人

無名氏

十四首

雜詩

雜調

又 又 又 又 又 又 又

雜詞

雜詞

又

又

秋思

一

欽定四庫全書

才調集卷二

唐 韋穀 撰

溫飛卿

六十一首

過華清宮二十二韻

憶昔開元日承平事勝遊貴妃專寵幸天子富春秋月
白霓裳殿風乾羯鼓樓鬪雞花蔽膝騎馬玉搔頭繡轂
千門妓金鞍萬戶侯薄雲歌雀扇輕雪犯貂裘過客聞
韶護居人識冤旒氣和春不覺煙暖霽難收澁浪涵瑤

梵晴陽上綵旂卷衣輕髻嬾窺鏡淡蛾羞屏掩芙蓉帳
簾褰玳瑁鉤重瞳分渭曲纖手指神州御案迷萱草天
袍妬石榴深宮藏浴鳳鮮隰媚潛虬不料邯鄲螽俄成
卽墨牛劒鋒揮太皞旗焰拂蚩尤內嬖陪行在孤臣預
坐籌瑤簪遺翡翠霜仗駐驂騶艷笑雙飛斷香魂一哭
休蚤梅悲蜀道高樹隔昭丘朱閣重霄近蒼岬萬古愁
至今湯殿水鳴咽縣前流

洞戶二十二韻

洞戶連蛛網方疏隱碧潯燭盤煙墜燼簾壓月通陰粉
白仙郎署霜清玉女砧醉鄉高窈窕基陣靜暗暗素手
瑠璃扇玄髻玳瑁簪昔邪看寄迹梔子咏同心樹列千
秋勝樓懸七夕鍼舊詞翻白紵新賦換黃金唳鶴調蠻
鼓驚蟬應寶琴舞疑繁易度歌轉斷難尋露委花相妬
風歌柳不禁橋彎雙表迴池漲一篙深清蹕傳恢囿黃
旗幸上林神鷹參翰苑天馬破蹄涔武庫方題品文園
有好音朱莖殊菌蠢丹桂欲蕭森黼帳迴瑤席華燈對

錦衾畫圖驚走獸書帖得來禽河曙秦樓映山晴魏闕
臨綠囊逢趙后青瑣見王沈任達嫌孤憤疎慵倦九箴
若為南遁客猶作卧龍吟

握柘詞

楊柳紫橋綠玫瑰拂地紅繡衫金駉褰花髻玉瓏璫宿
雨香潛潤春流水暗通畫樓初夢斷曉日照湘風

碧澗驛曉思

香燈伴殘夢楚國在天涯月落子規歇滿庭山杏花

送人東遊

荒戍落黃葉浩然離故關
高風漢陽渡初日郢門山
江上幾人在天涯孤棹還
何當重相見尊酒慰離顏

偶題

孔雀眠高閣櫻桃拂短簷
畫明金冉冉語玉纖纖細
雨無妨燭輕寒不觸簾
欲將紅錦段因夢寄江淹

贈知音

翠羽花冠碧樹雞未明
先向短牆啼窗間謝女青
蛾斂

門外蕭郎白馬嘶
星漢漸移庭竹影
露珠猶綴野花迷
景陽宮裏鐘初動
不語垂鞭上柳堤

鄆杜郊居

槿籬芳接近樵家
隴麥青青一徑斜
寂寞遊人寒食後
夜來風雨送梨花

送李億東歸

黃山遠隔秦樹紫
禁斜通渭城別路
青青柳弱前溪漠
漠苔生和風澹蕩
歸客落月殷勤
早鶯灞上金尊未
飲

讌歌已有餘聲

陳宮詞

鷄鳴人草草香輦出宮花
妓語細腰轉馬嘶金面斜
早鶯隨綵仗驚雄雉避凝笳
淅瀝湘風外紅輪映曙霞

春日野行

騎馬踏煙莎青春柰怨何
蝶翎朝粉盡鴉背夕陽多
柳艷欺芳帶山愁縈翠蛾
別情無處說方寸是星河

西州詞

悠悠復悠悠昨日下西州西州風色好遙見武昌樓武
昌何鬱鬱儂家定無匹小婦被流黃登樓撫瑤瑟朱絃
繁復輕素手直淒清一彈三四解掩抑似含情南樓登
且望西江廣復平艇子搖兩檠催過石頭城門前烏柏
樹慘淡天將曙鷓鴣飛復還郎隨早帆去回頭語同伴
定復負情儂去帆不安幅作抵使西風他日相尋索莫
作西州客西州人不歸春草年年碧

一 春洲曲

韶光染色如蛾翠綠濕紅鮮水容媚蘓小慵多蘭渚間
融融浦日鷓鴣寐紫騮蹀躞金銜嘶岸上揚鞭煙草迷
門外平橋連柳堤歸來晚樹黃鶯啼

陽春曲

雲母空窗曉煙薄香昏龍氣凝輝閣霏霏霧雨杏花天
簾外春寒著羅幙曲欄伏檻金麒麟沙苑芳郊連翠茵
廐馬何能噉芳草路人不敢隨流塵

堂堂曲

或刻錢
塘曲

錢塘岸上春如織
淼淼寒潮帶晴色
淮南遊客馬連嘶
碧草迷人歸不得
風飄客意如吹煙
纖指慙勤傷雁絃
一曲堂堂紅燭筵
長鯨瀉酒如飛泉

春日將欲東歸寄新及第苗紳先輩

幾年辛苦與君同
得喪悲歡盡是空
猶喜故人先折桂
自憐羈客尚飄蓬
三春月照千山道
十日花開一夜風
知有杏園無路入
馬前惆悵滿枝紅

經李徵君故居

露濃煙重草淒淒樹映闌干柳拂堤一院落花無客醉
五更殘月有鶯啼芳筵想像情難盡故樹荒涼路已迷
惆悵羸驂往來慣每經門巷亦長嘶

經舊遊

或作懷
真珠亭

珠箔銀鈎近綵橋昔年曾此見嬌嬈香燈悵望飛瓊鬢
涼月慙勤碧玉簫屏倚故窗山六扇柳垂寒砌露千條
短牆紅雨蒼苔遍拾得當時舊翠翹

宿杜城亡友李羽處士故墅

柳不成絲草帶煙海槎東去鶴歸天愁腸斷處春何限
病眼開時月正圓花若有情還悵望水應無事莫潺湲
終知此恨難消遣辜負南華第一篇

夜看牡丹

高低深淺一欄紅把火慙勤照露叢希逸近來成嬾病
不能容易向春風

池塘七夕

月出西南露氣秋綺寮河漢在鍼樓楊家繡作鴛鴦帳

張氏金為翡翠鈎銀燭有光妨宿燕畫屏無睡待牽牛
萬家砧杵三篙水一夕橫塘是舊遊

和友人悼亡

一刻喪歌姬

玉貌潘郎淚滿衣畫羅輕鬢兩霏微紅蘭委露愁難盡
白馬朝天望不歸寶鏡塵昏鸞影在鈿箏絃斷雁行稀
春來多少傷心事碧草侵階粉蝶飛

和王秀才傷歌姬

月缺花殘莫愴然花須終發月終圓更能何事銷芳念

亦有濃華委逝川一曲艷歌留婉轉九原春草妬嬋娟
王孫莫學多情客自古多情損少年

春莫宴罷寄宋壽先輩

斜掩朱門花外鐘曉鶯時節好相逢窗間桃蕊宿粧在
雨後牡丹春睡濃蘓小丰姿迷下蔡馬卿才調似臨邛
誰憐芳草生三徑參佐橋西陸士龍

題柳

楊柳千條拂面絲綠煙金穗不勝吹香隨靜婉歌塵起

影伴嬌嬈舞袖垂羌管一聲何處曲流鶯百轉最高枝
千門九陌花如雪飛過宮牆兩不知

春日偶成

西園一曲艷陽歌擾擾車塵負薜蘿自欲放懷猶未得
不知經世竟如何夜聞猛雨判花盡寒戀重衾覺夢多
釣渚別來應更好春風還為起微波

途中偶作

石路荒涼接野蒿西風吹馬利如刀小橋連驛楊柳晚

廢寺入門禾黍高鷄犬夕陽喧縣市鳬鷺秋水曝城壕
故山有夢不歸去官樹陌塵何太勞

贈彈箏人

天寶年中事玉皇曾將新曲教寧王鈿蟬金鳳皆零落
一曲伊州淚萬行

瑤瑟怨

冰簟銀床夢不成碧天如水夜雲輕鴈聲還向瀟湘去
十二樓中月自明

春日野行

日西塘水金堤斜，碧草芊芊晴吐芽。
野岸明媚山芍藥，水田叫噪官蝦蟆。
鏡中有浪動菱蔓，陌上無風飄柳花。
何事輕撓向溪客，綠萍方好不歸家。

和友人溪居別業

積潤初銷碧草新，鳳陽晴日帶雕輪。
風飄弱柳平橋晚，雪點寒梅小院春。
屏上樓臺陳后主，鏡中金翠李夫人。
花房透露紅珠落，蛺蝶雙雙護粉塵。

宿城南亡友別墅

水流花落歎浮生又伴遊人宿杜城
還似昔年殘夢裏透簾斜月獨聞鶯

偶遊

曲巷斜臨一水間小門終日不開關
紅珠斗帳櫻桃熟金尾屏風孔雀閒
雲髻幾迷芳草蝶額黃無限夕陽山
與君便是鴛鴦侶休向人間覓往還

郭處士擊甌歌

佶栗金虬石潭古
勺陂潋灩幽脩語
湘君寶馬上神雲
碎佩叢鈴滿煙雨
吾聞三十六宮花
離離軟風吹春星
斗稀玉宸冷磬破
昏夢天露未乾香
著衣蘭釵委墜雲
垂髮小響丁當逐
迴雪晴碧煙滋重
疊山羅屏半掩桃
花月太平天子駐
雲車龍壚勃鬱雙
蟠拏宮中近臣抱
扇立侍女低鬟落
翠花亂珠觸續正
跳蕩傾頭不覺金
烏斜我亦為君長
歎息絨情遠寄愁
無色莫沾香夢綠
楊絲千里春風正
無力

錦城曲

蜀山攢黛留晴雪
蒼筤芽紫九折江
風吹巧剪霞綃
花上千枝杜鵑血
杜鵑飛入巖下叢
夜叫思歸山月中
巴水漾情情不盡
文君織得春機紅
怨魂未歸芳草死
江頭學種相思子
樹成寄與望鄉人
白帝荒城五千里

張靜婉採蓮曲

并序

靜婉羊倂妓也其容絕世倂自為採蓮二曲
今樂府所存失其故意因歌以俟採詩者事

具載梁史

蘭膏墜髮紅玉春燕釵拖頸拋盤雲城西楊柳向嬌晚
門前溝水波粼粼麒麟公子朝天客珂馬璫璫渡春陌
掌中無力舞衣輕剪斷鮫綃破春碧抱月飄煙一尺腰
麝臍龍髓憐嬌嬈秋羅拂水碎光動露重花多香不銷
鸛鵲交交塘水滿綠芒如粟蓮莖短一夜西風送雨來
粉痕零落愁紅淺船頭折藕絲暗牽藕根蓮子相留連
郎心似月月易缺十五十六清光圓

照影曲

景陽粧罷瓊窗暖欲照澄明香步嬾橋上衣多抱彩雲
金鱗不動春塘滿黃印額山輕為塵翠鱗紅穉俱含顰
桃花百媚如欲語曾為無雙今兩身

塞寒行

燕弓弦勁霜封瓦撲簌寒雕睇平野一點黃塵起雁喧
白龍堆下千蹄馬河源怒濁風如刀剪斷朔雲天更高
晚出榆關逐征北驚沙飛迸衝貂袍心許凌烟名不滅

年年錦字傷離別彩毫一畫竟何榮空使青樓淚成血

湖陰詞

并序

王敦舉兵至湖陰明帝微行視其營伍由是
樂府有湖陰曲而亡其調因作而附之

祖龍黃鬚珊瑚鞭鐵驄金面青連錢虎髯拔劍欲成夢
日壓賊營如血鮮海旗風急驚眠起甲重光搖照湖水
蒼皇追騎塵外歸森索妖星陣前死五陵愁碧春萋萋
灞川玉馬空中嘶羽書如電入青瑣雪腕如搥催畫鞞

白虬天子金煌鏗高臨帝座迴龍章吳波不動楚山晚
花壓闌干春晝長

晚歸曲

格格水禽飛帶波孤光斜起夕陽多湖西山淺似相笑
菱刺惹衣攢黛蛾青絲繫船向江木蘭芽出土吳江曲
水極晴搖泛灩紅草平春染煙綿綠玉鞭騎馬楊叛兒
刻金作鳳光參差丁丁暖漏滴花影催入景陽人不知
彎彎弱柳遙相矚雀扇團團掩香玉蓮塘艇子歸不得

柳暗桑穠聞布穀

湘東夜宴曲

湘東夜宴金貂人楚女含情嬌翠嚬
玉管將吹插鈿帶錦囊斜拂雙麒麟
重城漏斷孤帆去惟恐瓊籤報天曙
萬戶沈沈碧樹圓雲飛雨散知何處
欲上香車俱脉脉清歌響斷銀屏隔
堤外紅塵蠟炬歸樓前澹月連江白

碌碌古詞

左亦不碌碌右亦不碌碌
野草自根肥羸牛生健犢融

蠟作杏蒂男兒不戀家春風破紅意女頰如桃花忠言
未見信巧語翻咨嗟一鞘無兩刃徒勞油壁車

春野行

草淺淺春如剪花壓李娘愁饑蠶欲成繭東城少年氣
堂堂金丸驚起雙鴛鴦含羞更問衛公子月到枕前春
夢長

醉歌

簷柳初黃燕新乳曉碧芊綿過微雨樹色深含臺榭情

鶯聲巧作煙花主錦袍公子陳杯觴撥醅百甕春酒香
入門下馬問誰在降階握手登華堂臨卽美人遠山眉
低抱琵琶含怨思朔風繞指我先笑明月入懷君自知
勸君莫惜金尊酒年少須臾如覆手辛勤到老慕簞瓢
于我悠悠竟何有洛陽盧仝稱文房妻子脚秃舂黃糧
阿耆光頭不識字指麾豪雋如驅羊天犀壓斷朱鼯鼠
瑞錦驚飛金鳳皇其餘豈足沾牙齒欲用何能報天子
駕馬垂頭搶暝塵驂騑一日行千里但有沉冥醉客家

支頤瞪目持流霞惟恐南園風雨落碧蕪狼籍棠梨花

織錦詞

丁冬細漏侵瓊瑟影轉高梧月初出簇簌金梭萬縷紅
鴛鴦艷錦初成足錦中百結皆同心蕊亂雲盤相間深
此意欲傳傳不得玫瑰作柱朱絃琴為君裁破合歡被
星斗迢迢共千里象齒薰爐未覺秋碧池已有新蓮子

蓮浦謠

鳴橈軋軋溪溶溶廢綠平煙吳苑東水清蓮媚兩相向

鏡裏見愁愁更紅
白馬金鞭大堤上
西江日夕多風浪
荷心有露似驪珠
不是真圓亦搖蕩

達摩支曲

擣麝成塵香不滅
拘蓮作寸絲難絕
紅淚文姬洛水春
白頭蘓武天山雪
君不見無愁高緯
花漫漫漳浦晏餘
清露寒一旦臣僚
共囚虜欲吹羌管
先沈瀾舊臣頭鬢
霜華早可惜雄心
醉中老萬古春歸
夢不歸鄴城風雨
連天草

三洲詞

團圓莫作波中月潔白無為枝上雪月隨波動碎潏潏
雪似梅花不堪折李娘十六青絲髮畫帶雙花為君結
門前有路輕離別惟恐歸來舊香滅

舞衣曲

藕腸纖縷袖輕春煙機漠漠嬌娥頻金梭浙瀝透空薄
剪落交刀吹斷雲張家公子夜聞雨夜向蘭堂思楚舞
蟬衫麟帶壓愁香偷得鴛鴦鏤金縷管含蘭氣嬌語悲

胡槽雪腕鴛鴦絲芙蓉力弱應難定楊柳風多不自持
迴嚙笑語西窗客星斗寥寥波脉脉不逐秦王卷象牀
滿樓明月梨花白

惜春詞

百舌問花花不語低回似恨橫塘雨蜂爭粉蕊蝶分香
不似垂楊惜金縷願君留得常妖嬈莫逐東風還蕩搖
秦女含嚙向煙月愁紅帶露空迢迢

春愁曲

紅絲穿露珠簾冷百尺啞啞下纖縷遠翠愁山入卧屏
兩重雲母空烘影涼簪墜髮春眠重玉兔氤氲柳如夢
錦疊空牀委墜紅颼颼埽尾雙金鳳蜂喧蝶駐俱悠揚
柳拂赤欄纖草長覺後梨花委平綠春風和雨吹池塘

蘓小小歌

買蓮莫破券買酒莫解金酒裏春容抱離恨水中蓮子
懷芳心吳宮女兒腰似束家在錢塘小江曲一自檀郎
逐便風門前春水年年綠

春江花月夜詞

玉樹歌闌海雲黑花庭忽作青蕪國秦淮有水水無情
還向金陵漾春色楊家二世安九重不御華芝嫌六龍
百幅錦帆風力滿連天展盡金芙蓉珠翠丁星復明滅
龍頭劈浪哀笳發千里涵空澄水魂萬枝破鼻團香雪
漏轉霞高滄海西玻璃枕上聞天雞蠻絃代寫曲如語
一醉昏昏天下迷四方傾動煙塵起猶在濃香夢魂裏
後主荒宮有曉鶯飛來只隔西江水

懊惱曲

藕絲作線難勝鍼，蕊粉染黃那得深。
玉白蘭芳不相顧，青樓一笑輕千金。
莫言自古皆如此，健劍刺鐘鉛繞指。
三秋庭綠盡迎霜，惟有荷花守紅死。
廬江小吏朱斑輪，柳縷吐芽香玉春。
兩股金釵已相許，不令獨作空成塵。
悠悠楚水流如馬，恨紫愁紅滿平野。
野土千年怨不平，至今燒作鴛鴦瓦。

邊笳曲

朔管迎秋動，雕陰雁來早。
上郡隱黃雲，天山吹白草。
嘶馬渡寒磧，朝陽照霜堡。
江南戍客心，門外芙蓉老。

春曉曲

家臨長信往來道，乳燕雙雙拂煙草。
油壁車輕金犢肥，流蘓帳曉春鷄早。
籠中嬌鳥暖猶睡，簾外落花閒不掃。
衰桃一樹近前池，似惜紅顏鏡中老。

俠客行

欲出鴻都門，陰雲蔽城闕。
寶劍黯如水，微紅濕餘血。
白

馬夜頻驚三更灞陵雪

春日

柳岸杏花稀梅梁乳燕飛美人驚鏡笑嘶馬鴈門歸楚
宮雲影薄臺城心賞違從來千里恨邊色滿戎衣

咏嘯

毛羽斂愁翠黛嬌攢豔春恨容偏落淚低態定思人枕
上夢隨月扇邊歌繞塵玉鈎鸞不住波淺石磷磷

太子池

梨花雪壓枝。鶯轉柳如絲。嬾逐粧成曉。春融夢覺遲。鬢輕全作影。頻淺未成眉。莫信張公子。窗間斷暗期。

又

花紅蘭紫莖。愁草雨新晴。柳占三春色。鶯偷百鳥聲。日長嫌輦重。風暎覺衣輕。薄莫香塵起。長楊落照明。

顧況十一首

悲歌

并序。以下六首或俱刻悲歌或每首增題目章法顛倒不倫今依宋刻本集詮次

情思發動聖賢所不免也故師乙陳其宜延

陵審其音理亂之所經王化之所興信無逃
於聲教豈徒文彩之麗耶遂作歌以悲之

邊城路今日畊田昔人墓岸上沙昔日江水今人家今
人昔人共長歎四氣相催節迴換明月皎皎入華池白
雲離離渡霄漢

思遠曲

臨春風聽春鳥別時多見時少愁人一夜不得眠瑤井
玉繩相向曉

悲歌

我欲昇天天隔霄我欲渡水水無橋我欲上山山路險
我欲汲井井泉遙

又

越人翠被今何寂獨立江邊莎草碧紫燕西飛欲寄書
白雲何處逢來客

又

新繫青絲百尺繩心在君家轆轤上我心皎潔君不知

轆轤一轉一惆悵

又

何處風光驚曉幕江南綠水通朱閣美人二八顏如花
泣向東風畏花落

梁廣畫花歌

王母欲過劉徹家飛瓊夜入雲輶車紫書分付與青鳥
却向人間求好花上元夫人最小女頭面端正能言語
手把梁生畫花看凝頻掩笑心相許心相許為白阿孃

從嫁與

送別日晚歌

集無送別二字

日冥冥兮下山望佳人兮不還
花落兮屋上草生兮階
前日日兮春風芳菲兮欲滅
老不可兮更少君何為兮
輕別

行路難

君不見
擔雪塞井空用力
炊沙作飯豈堪食
一生肝膽
向人盡相識
不如不相識
冬青樹上挂凌霄
歲晏花凋

樹不凋凡物各自有根本種禾終不生豈苗行路難行
路難何處是平道中心無事當富貴今日看君顏色好

棄婦詞

此詞李白集中亦有之比
顧集更詳未知果誰作

古來有棄婦棄婦有歸處今日妾辭君遣妾何處去本
家零落盡慟哭來時路憶昔未嫁君聞君甚周旋綺羅
錦繡段有贈黃金千十五許嫁君二十移所天結髮日

未久

諸本俱作自從結髮
日未幾七字一句

離君緬山川家家盡歡樂孤

妾空自憐幽閨多沉思盛事無十年相思若循環枕席

生流泉流泉咽不燥獨夢關山道及此見君歸君歸妾
已老物華惡衰賤新寵方妍好掩淚出故房傷心劇秋
草自妾為君妻君東妾在西羅帷到曉恨玉貌一生啼

妾有嫁時服輕雲淡翠霞瑠璃作斗帳四角金蓮花

諸本

無此
四句

自從離別後不覺塵埃厚常嫌玳瑁孤猶羨鴛鴦

偶玉顏逐霜霰賤妾何能守寒沼落芙蓉秋風散楊柳
以此傾顙顙空持舊物還餘生亦何寄誰肯相攀牽君
恩既斷絕相見何年月悔傾連理杯虛作同心結女羅

附青松貴在相依投浮萍共綠水教作若為流不歎君
棄妾自歎妾緣薄憶昔初嫁君小姑纔倚牀今日妾辭
君小姑如妾長回頭語小姑莫嫁如兄夫

送行歌

送行人歌一曲何者為泥何者玉年華已向秋草裏春
夢猶傳故山綠

吳融二首

浙東筵上有寄

此首集中無。或見六一詞中
調名瑞鷓鴣氣味亦不似唐人

襄王席上一神仙
眼色相當語不傳
見了又休真似夢
坐來雖近遠如天
隴禽有意猶能說
江月無心也解圓
更被東風助惆悵
落花時節蝶翩翩

富水驛東楹有人題詩

筆跡柔媚
出自纖指

繡纓霞翼兩鴛鴦
金島銀川是故鄉
只合雙飛便雙死
豈悲相失與相忘
煙花夜泊紅蕖膩
蘭渚春遊碧草芳
何事遽驚雲雨別
秦山楚水兩乖張

崔塗 六首

夕次洛陽道中

秋風吹故城城下獨吟行
高樹鳥已息古原人尚耕
流年川暗度往事月空明
不復歎岐路馬前塵夜生

巴南道中

久客厭岐路出門吟且悲
平生未到處落日獨行時
芳草長綠故人難重期
邛崃更南渡鄉國是天涯

巴陵夜泊

家依楚塞窮秋別身逐孤舟
萬里行一曲巴歌半江月

便應消得二毛生

春夕旅遊

或無旅
遊二字

水流花謝兩無情
送盡東風過楚城
蝴蝶夢中家萬里
杜鵑枝上月三更
故園書動經年絕
華髮春移兩鬢生
自是不歸歸便得
五湖煙景有誰爭

放鵝鵝

秋入池塘風露微
曉開籠檻看初飛
滿身金翠畫不得
無限煙波何處歸

巫峽旅別

五千里外三年客
十二峰前一望秋
多少別魂招不得
夕陽西下水東流

盧綸

七首

春詞

北苑羅裙帶塵襪
錦繡鞵醉眠芳樹下
半被落花埋

蚤春歸塾屋別業寄耿拾遺
漳李校書端

野日初晴麥隴分
竹園相接鹿成羣
萬家廢井生新草

一樹繁花對古墳引水忽驚冰滿澗向田空見石和雲
可憐荒歲青山裏惟有松枝好寄君

晚次鄂州

雲開遠見漢陽城猶是孤帆一日程賈客晝眠知浪靜
舟人夜語覺潮生三湘愁鬢逢秋色萬里歸心對月明
舊業已隨征戰盡更堪江上鼓鼙聲

古豔詞

殘粧色淺髻鬟開笑映珠簾觀客來推醉惟知弄花鈿

潘郎不敢使人催

又

自拈裙帶結同心
暖處偏知香氣深
愛捉狂夫問閒事
不知歌舞用黃金

代表將軍罷戰歸
舊里贈朔北故人

結髮事疆場
全生到海鄉
連雲防鐵嶺
同日破漁陽
牧馬胡天曉
移軍磧路長
枕戈眠古戍
吹角立繁霜
歸老勛仍在
酬恩虜未忘
獨愁過邑里
多病對農桑
雄劍依

塵縈陰符寄藥囊空餘麾下士猶逐羽林郎

逢南中使因寄嶺外故人

見說南來處蒼梧接桂林過秋天更暖近海日長陰巴
路緣雲出蠻鄉入洞深信迴人自老夢到月應沉碧水
通春色青山寄遠心炎方難久客莫使鬢毛侵

集作為
爾一沾

襟

無名氏

十四首。時刻詮次
不倫依宋刻釐正

雜詩

金四八二
卷二
青天無雲月如燭
露泣梨花白如玉
子規一夜啼到明
美人獨在空房宿

又

空賜羅衣不賜恩
一薰香後一銷魂
雖然舞袖何曾舞
常對春風裛淚痕

又

不洗殘粧凭繡牀
却嫌鸚鵡繡鴛鴦
迴鍼刺到雙飛處
憶著征夫淚數行

又

眼想心思夢裡驚
無人知我此時情
不如池上鴛鴦鳥
雙宿雙飛過一生

又

一去遼陽繫夢魂
忽傳征騎到中門
紗窗不肯施紅粉
徒遣蕭郎問淚痕

又

鶯啼露冷酒初醒
卷盡樓臺曉角鳴
翠羽帳中人夢覺

寶釵斜墜枕函聲

又

滿目笙歌一段空
萬般離恨總隨風
多情為謝殘陽意
與展晴霞片片紅

又

兩心不語暗知情
燈下裁縫月下行
行到堦前知未睡
夜深聞放剪刀聲

雜調

勸君莫惜金縷衣
勸君須惜少年時
有花堪折直須折
莫待無花空折枝

雜詞

石沈遼海闊
劍別楚山長
會合知無日
離心滿夕陽

雜詞

行人南北分征路
流水東西接御溝
終日坡前怨離別
謾名長樂是長愁

又

偏倚繡牀愁不起雙垂玉筍翠鬟低卷簾相待無消息
夜合花開日又西


又

悔將淚眼向東開特地愁從望裏來三十六峰猶不見
況伊如燕這身材

秋思

或刻第十卷作三五七言
詩。亦見李太白集中

秋風清秋月明落葉聚還散寒鴉棲復驚相思相見知
何日此時此夜難為情



才調集卷二